

**ზოგიერთი ქრისტიანული ცნება „ვეფხისტყაოსანსა“  
და ძველ ქართულ სასულიერო პოეზიაში**

**1. „დახსნა“**

სიკვდალ-სიცოცხლის პრობლემას ყველა ძველი რელიგია ეხე-  
ზოდა და წყვეტდა თავისებურად, თუმცა რიგ შემთხვევაში ბევრი  
საერთოც შეინიშნება, რაც, რასაკვირველია, ცალკე კვლევის სა-  
განია. მონოთეისტურ რელიგიათა შორის ამავე საკითხებს განსა-  
კუთრებულ ყურადღებას ჟთმობდა ქრისტიანული თეოლოგიაც,  
რომლის წიაღში იმთავითვე შემუშავდა მწყობრი კონცეფცია. მა-  
გალითად, როგორც ცნობილია, ქრისტიანულმა თეოლოგიამ შეი-  
მუშავა თეორია „არა-არსისაგან არსად მოყვანებისა“. ე. ი. წარ-  
მოიშვა მოძღვრება, რომელიც გვასწავლიდა, რომ ღმერთმა არა-  
ფრისაგან შექმნა ყველაფერი, მათ შორის სიცოცხლაც. ძველ  
აღთქმაში ადამიანის გაჩენის შესახებ ვკითხულობთ: „თქუა ღმერ-  
თმან: ვქმნეთ კაცი ხატად და მსგავსად ჩუენდა... და შექმნა ღმერ-  
თმან კაცი, მტუერისა მიმღებელმან ქუეყანისაგან და შთაბერა პირ-  
სა მისსა სული სიცოცხლისა და იქმნა კაცი სულად ცხოველად“<sup>1</sup>.  
შუა საუკუნეების თეოლოგიაში ეს აზრი, გამოთქმული მოსე წი-  
ნასწარმეტყველის მიერ, დოგმად გამოცხადდა. სამყაროსა და ადა-  
მიანის შექმნის კრეაციონისტულ შეხედულებასთან ერთად ქრის-  
ტიანულმა თეოლოგიამ შეითვისა აგრეთვე ანტიკური ბერძნული  
ფილოსოფიიდან მოძღვრება ოთხი ელემენტის, კავშირის, ნივთის  
(მიწა, წყალი, ცეცხლი და ჰაერი) შესახებ. ნემესიოს ემესელის  
თხზულების „ბუნებისათვის კაცისა“ პეტრიწისეულ თარგმანში აღ-

<sup>1</sup> ბიბლია, I, შესაქმე, ტფილისი, 1884, გვ. 3, 4.

ნიშნული საკითხის შესახებ ვკითხულობთ: „სხეულთაგან არს კაცი, ხოლო ყოველი სხეული ოთხთა ასოთაგან შემტკიცებულა... არიან უკუე ასონი ოთხ: ქუეყანა, წყალი, აირი, ცეცხლი... რამეთუ თვთოეულსა ასოსა მეგრ დაუღღვით ორი რომელობაჲ აქუს გუ-არმქმნელი მისი: არს უკუე ქუეყანაჲ ჳმელ და გრილ, ხოლო წყალი გრილ და ნოტიო, ხოლო აირი — ნოტიო და მკურვალე მისისაებრ ბუნებისა, არამედ ცეცხლი მკურვალე და ჳმელ“<sup>2</sup>.

ამის მიხედვით ქრისტიანულ თეოლოგიურ-ფილოსოფიურ მწერლობაში შემუშავდა მოძღვრება სიცოცხლისა და სიკვდილის შესახებ, რომლის მიხედვით ადამიანის სხეული შედგება ოთხი ელემენტისაგან (ასოსაგან) და მათი შეზავება ჳქმნის სიცოცხლეს სულის ჩადგმისთანავე, ხოლო ამ ელემენტთა დაშლა, ანუ, რუსთაველის სიტყვით, „დახსნა“, რასაც აუცილებლად მოსდევს სულისა და ხორცის გაყრაც, იწვევს სიკვდილს.

როგორც ცნობილია, ნეოპლატონიზმი სიკვდილის სიდიადეს ჳადაგებდა, სიკვდილს ისახავდა განთავისუფლებად და არსებობის უმაღლეს მიზნად. ამიტომაც უწოდებენ ხოლმე ნეოპლატონიზმს „სიკვდილის ფილოსოფიას“. სასულიერო პოეზია, განსხვავებით ნეოპლატონური მოძღვრებისაგან, არ ჳადაგებს სიკვდილის სიდიადეს, ამქვეყნიური ცხოვრება მას მიაჩნია საიქიო, იმქვეყნიური ცხოვრებისათვის მზადების წინა საფეხურად, რომლის გარეშე შეუძლებელია კაცთა მოდგმის ნორმალური განვითარება. ამასთან ერთად, სასულიერო პოეზიის ზოგიერთ ნიმუშში უკვე მქლავნდება უსაზღვრო სევდა სოფელთან, საწუთროსთან მოსალოდნელი განშორების გამო.

ნეოპლატონიზმი ამქვეყნიურ ცხოვრებას არარაობად მიიჩნევს და მასთან განშორებას ლხინად, უდიდეს ბედნიერებად თვლის. ნეოპლატონიზმის ერთ-ერთი უდიდესი და უკანასკნელი წარმომადგენელი პროკლე დიადოხოსი თავის დიალექტიკაში იძლევა ძირითადად სიკვდილის ჳიმნს და არა სიცოცხლისას. სიკვდილი მიაჩნდა არსებობის უმაღლეს მიზნად და სულის განთავისუფლებად ტანის, ხორცის ტყვეობისაგან.

ცნობილია, რომ სასულიერო მწერლობა ხელმძღვანელობს ბიბლიური მოძღვრებით სოფლის შესახებ: „სიყვარული სოფლისაჲ მტერობა არს ღმრთისაჲ“. მაგრამ ეს ბიბლიური დებულება ხში-

<sup>2</sup> ნ ე მ ე ს ი ო ს ე მ ე ს ე ლ ი, ბუნებისათვის კაცისა, ს. გორგაძის გამოც., ტფილისი, 1914, გვ. 13, 61—62.

რად არის უარყოფილი სასულიერო მწერლობის ისეთ მნიშვნელოვან დარგებში, როგორცაა აგიოგრაფია და სასულიერო პოეზია. ხშირად აგიოგრაფიული თხზულებისა თუ ჰიმნოგრაფიული ნაწარმოების პერსონაჟები სწორედ „სოფლის სიყვარულს“ ამქდავნიებენ და უდიდესი შინაგანი განცდითა და სინანულით თმობენ სოფლის მოთხოვნილებებს. ამქვეყნიური ცხოვრების უარყოფა და სოფლისაგან განდგომა, მასთან დაკავშირებული ფსიქოლოგიური განცდა გასაოცარი სიზუსტითა და სიმკვეთრით შენიშნა გიორგი მერჩულემ, როდესაც ზენონის მიერ მამისეული ქონების დატოვებისა და მონაზვნად აღკვეთის ეპიზოდს აღწერს: „რამეთუ მონაგებთა დატევებაჲ სისხლთა დათხევასა ემსგავსებისო“, — ამბობს ცხოვრების ღრმად მცოდნე მერჩულე. ამ შედარებიდან აშკარად ჩანს, თუ რა მტკიცედ არის დაკავშირებული და მიჯაჭვული ადამიანი სოფელს და რა მძიმეა მისგან განდგომა და განშორება.

მნიშვნელოვან ადგილს იჭერს სოფლის წარმავლობისა და სიკვდილის გარდუვალობის იდეა ძველ ქართულ სასულიერო პოეზიასა და „ვეფხისტყაოსანში“. ძველი ქართული სასულიერო პოეზია აღიარებს სოფლის, ამქვეყნიურობის წარმავლობასა და საიქიო ცხოვრების უკვდავებას, მუდმივობას. უძველესი პოეტური ქმნილება „ეკლესიასტი“ ამბობს: „ნათესავი წარვალს და ნათესავი მოვალს და ქუეყანაჲ უკუნისამდე ჰგიეს. და აღმოვალს მზმ და დაჰვალს მზმ და ადგილსა თვისსა მივალს. აღმოვალს იგი და მუნვე მივალს სამხრით და მოჰვლის ჩრდილოჲთ“<sup>3</sup>. აქ გამოთქმულ აზრს ადამიანთა, საერთოდ, ცოცხალ არსებათა მოკვდავობისა და ქვეყნის უკუნისამდე, დაუსრულებლად არსებობის შესახებ ქართველი ჰიმნოგრაფები ხშირად იმეორებენ თავიანთ თხზულებებში. ეზრას საგალობელში წმიდა ეფთჳმისადმი ვკითხულობთ: „გძულდა ფრიად საწუთროჲ ესე წარმავალი და გიყუარდა საუკუნოჲ, სადა იგი აწ მკვდრ ხარ და სუფევ უკუნისამდე. დაუტევე ნებაჲ ჯორცთაჲ და შეუდეგ ღმერთსა, ეფთჳმი, და მიემთხვე საღმრთოთა მათ კეთილთა ჩუენგან მოუკლებელთა“<sup>4</sup>. ეზრას შეხედულების თანახმად, საწუთრო, ეს ქვეყანა, ადამიანთა ცხოვრება წარმავალია, დროებითია, რომელიც წმიდა ეფთჳმის სძულდა, სძულდა იგი სწორედ თავისი წარმავლობისა და ცვალებადობის გამო; ხოლო უყვარდა

<sup>3</sup> კ. ქვეკელიძე, განმარტებაჲ ეკლესიასტიისაჲ მიტროფანე ზემრნელ მიტროპოლიტისაჲ; ტფილისი, 1920, გვ. 180.

<sup>4</sup> მიქელ მოდრეკილის ჰიმნოგრაფიული კრებული, S—425, გვ. 225 (R—113).

საუკუნო ცხოვრება, ე. ი. საიქიო, უყვარდა იგი თავისი მუდმივობის, უკვდავობის გამო. ადამიანი ხომ წუთისოფლის სტუმარია, დროებით მოვლენილი დედამიწაზე ღმერთის მიერ პირველცოდვის შედეგად, ხოლო რომ დაიმკვიდროს საუკუნო სასუფეველი იმქვეყნად, ამიტომ უნდა შეწიროს მას ყოველივე ამქვეყნიური, უნდა „დაუტეოს ნებაჲ ჯორცთაჲ და შეუდგეს ღმერთსა“, რითაც იგი მოინანიებს თავის ცოდვებს.

აბოს ერთ-ერთ საგალობელში, რომლის ხელნაწერი ვაშინგტონის ერთ-ერთ ბიბლიოთეკაშია დაცული, ვკითხულობთ: „რამეთუ წარმავალ არს შიში ტანჯვათა წუთ-ჟამისათაჲ, ხოლო მერმე დიდებაჲ, დაულევნელ არს ღირსთა მისთათჳს“<sup>5</sup>. ამქვეყნიური ტანჯვა საუკუნო ცხოვრების წინამძღვრად არის მიჩნეული და წუთისოფელთან მოსალოდნელი განშორებით გამოწვეული შიში წარმავალია, რადგან ღირსეულთ დიდება მიეღიო საიქიოში ამქვეყნად მიღებული ტანჯვა-წამების სანაცვლოდ, ღმერთი სიკეთეს მიაგებს ასეთ ადამიანებს და მათ სასუფეველში დაუმკვიდრებს ადგილს.

სპეციალური ლიტერატურაში გამოთქმულია მოსაზრება, რომ ქრისტიანულ საეკლესიო მსოფლმხედველობა ქადაგებს ამქვეყნიური ცხოვრების არარაობასა და სიძულვილს, ამის გამო ადამიანის დანიშნულებას საიქიო ცხოვრებისათვის მზადება წარმოადგენს. სასულიერო პოეზია, როგორც აღნიშნეთ და ვნახეთ ეზრას საგალობლის მაგალითზე, აღიარებს ამქვეყნიური ცხოვრების არარაობას და სიძულვილს, ამავე დროს, განსაკუთრებით უსვამს ხაზს იმ მომენტს, რომ ეფთჳმის სძულდა „საწუთროჲ წარმავალი“ \* და უყვარდა „საუკუნოჲ“, აქ სოფლის წარმავლობისა და იმქვეყნიურობის მარადიულობის იდეაა გამოკვეთილი და წარმოჩენილი. ქართული სასულიერო პოეზიის ორიგინალურ თუ ნათარგმნ ნაწარმოებებში არც თუ ისე იშვიათად მოისმის მსოფლიო კაემნის, ამაოების, საწუთროს დაუდგრომლობისა და წარმავლობის იდეები. სიკვდილის გარდუვალობის აღიარება, რაც უთუოდ ბიბლიიდან და მისგან მომდინარე თხზულებებიდან იღებს სათავეს (მაგ., ეკლესიასტე).

<sup>5</sup> კ. კეკელიძე, უცნობი რედაქცია ქართული ჰიმნოგრაფიული თქუნისა, ეტიუდები ძველი ქართული ლიტერატურის ისტორიიდან, VIII, თბილისი, 1962, გვ. 45.

სოფლის ამაოებაზე მიუთითებს იოანე მინჩხის საგალობლები. „ამაო არს ცხორებაჲ ჩუენი. რაჲმე შეეწიროთ შენდა, ქრისტე, ანუ ვითარ გადიდებთ შენ, რა გარდაემატნეს სახიერებანი შენნი ჩუენდა მომართ შენთა მორწმუნეთა, უხვად გუილუწი სოფელსა შინა და კუალად მომცემ უხრწნელსა ცხორებასა“<sup>6</sup>. ამქვეყნიური მოღვაწეობა საწინდარი უნდა გახდეს საუკუნო ცხოვრებისა, რათა „მუნ“ სასუფეველი დაუმკვიდროს ქრისტე ღმერთმა ღვთისმსახურს. არაფერი ისე არ დაფასდება ღმერთის მიერ, როგორც მზადება საიქიოსათვის, ადამიანმა მხოლოდ საუკუნო ცხოვრებისათვის უნდა იზრუნოს, რადგან „წარმავალ არს სიძლიდრე ამაოჲსა ამის ცხორებისაჲ და დაუდგრომელ არს ჟამი წელთა ჩუენთაჲ“<sup>7</sup>. ადამიანი ცდილობს „კელითა გლახაკისაჲთა“ სასუფეველში მოხვედრას. ყოველმა ცოცხალმა არსებამ, ყოველმა ნორმალურად მოაზროვნე ადამიანმა უნდა შეიგნოს ამ სოფლის წარმავლობა. წმიდა გიორგისადმი მიძღვნილ საგალობელში იოანე მინჩხი ამბობს: „განიმსტურენ სიბრძნით გზანი საუკუნოჲსა ცხორებისანი და გულისკმა ჰყავ საზღუარი ცუდისა ამისა საწუთროჲსაჲ, რომელი ყოვლით კერძო ამაო არს. და სიხარულით შეეყავ წმიდათა გზასა, გიორგი, და განიშორე გზათა სიცრუვისათა“<sup>8</sup>. საწუთრო, წუთისოფელი მაცდურია, რადგან ადამიანთა გონებას აბნელებს „შვებითა და მთრვალობითა“, შინაგან სულიერ სახედველს, თვალს უბრმავებს, ხორციელი ვნებები აცდუნებს, რაც შემდეგში ხდება დასაბამი და მიზეზი მისი საუკუნო სასჯელისა. ვინც ამქვეყნიურ ცხოვრებაში მხოლოდ ქველმოქმედი იქნება, ის დაიმკვიდრებს სასუფეველში ღირსეულ ადგილს. საერთოდ, მინჩხი ურჩევს ყველას, რომ „ნუმცა მივიქეციოთ ზრუნვასა საწუთროჲსა საქმეთასა, რაჲთა არაჲ დავჰქსნდეთ ჩუენ სულიერსა მას ზრუნვასა სულთა ჩუენთასა, რამეთუ ვითარცა სიზმარი ამაო არს ყოველივე ზრუნვაჲ კორცთაჲ“<sup>9</sup>. ადამიანმა წინასწარ არ იცის მისი აღსრულების ჟამი, თუ ეს ეცოდინებოდა, მაშინ ყოველ წამს არ იქნება მის მოლოდინში და არ შეშინდება. სწორედ ეს შეუცნობლობა სხეულისა და სულის განშორების ჟამისა ბადებს შიშს და ამიტომ ლოცვით უნდა განიქარვოს იგი.

6 Sin — 75, 146b.

7 Sin — 5, V — 83.

8 Sin — 2, R — 4.

9 Sin — 5, V — 119.

ამქვეყნიური ცხოვრებისათვის ზრუნვა ამაოა, წუთისოფელი უნდობი და გაუტანელია. გასაოცარი პოეტური გრძნობითა და განცდით უპირისპირებს საწუთროსა და საიქიოს იოანე მინჩხი: „ამო არს ცხორებაჲ ჩუენი, ვინაჲთგან დაჰქსნის მას სიკუდილი, ცუდად ხატად ვალნ კაცი, ამოდ შურებინ და იუნჯებნ, და არა უწყინ, ვისდა იყოს იგი. ჯერ-არს ჩუენდა გულისკმის ყოფაჲ და ზრუნვაჲ ცხორებისა საუკუნოჲსა. მეკიცხევს ჩუენ საწუთროჲ ესე, რომელთა ვერ გულისკმა ვყოთ დაუდგრომლობაჲ მისი, და მაცთუნებს ჩუენ მარადის ღონით მით მანქანებითა მისთაჲთა და ამოსა მაჯერებს, ვითარცა ღამე სიზმარი მძინარესა“<sup>10</sup>. ამ მოხდენილი შედეგებით ნათლად არის გამოხატული სინანული ადამიანის ამო შრომის გამო, რადგან არც იცის, რისთვის ან ვისთვის წვალობს. სიკვდილი ათანასწორებს ყველას, ამიტომ სჯობს საუკუნო ცხოვრებაზე ზრუნვა; ყოველმა ადამიანმა უნდა შეიგნოს, საღად განსაჯოს ამქვეყნიური ცხოვრების წარმავლობა და სიკვდილის გარდუვალობა. ყველაფერი გაქრება, გაქრება ჩვენი სიცოცხლეს, ვითარცა სიზმარი და ყოველივე მიწად იქცევა. ეს აზრია გამოთქმული იოანე მინჩხის საგალობელში, რომელიც ღვთიშობლისადმია მიძღვნილი: „გულისკმა ვყოთ ამოებაჲ ჩუენნი, რაჲთა ყოველნი მოკუდავ, მიწა ვართ, და ჟამნი ჩუენნი ვითარცა სიზმარნი, და არაჲ ვერჩდეთ ჩუენ წუთსა ამას ცხორებისა, რაჲთა ვითარცა აჩრდილი წარვალს და ვითარცა მტუერი ქუეყანისაჲ განიბნევის“<sup>11</sup>. ქართული სასულიერო პოეზია ძირითადად ამქვეყნის წარმავლობაზე, ამოებაზე, სიკვდილის გარდუვალობაზე მსჯელობს და წუთისოფელს იმქვეყნიური ცხოვრების სამზადისად მიიჩნევს. მაგრამ მასში ნათლად იგრძნობა და აშკარად გამოსკვივის სინანული და გულისტკივილი სოფლის დაუდგრომლობის გამო.

ბიზანტიური ქრისტიანული სასულიერო პოეზია იძლევა მეტად შინაარსიან ჰიმნებსა თუ საგალობლებს, რომლებშიც უდიდესი გულისტკივილით არის აღწერილი სიცოცხლესთან განშორება და საიქიოში გამგზავრება. მერვე საუკუნის უდიდესი ჰიმნოგრაფის იოანე დამასკელის გიორგი ათონელისეულ ქრისტეს შობის „დასდებელნი“ მიცვალებულსა ზედა გადმოცემულია ისეთი შემზარავი სურათი სიკვდილისა და მისი საშინელებისა, რომლის მსგავსი იშვიათად თუ მოიპოვება მსოფლიო პოეზიაში. მთელ სა-

<sup>10</sup> Sin—75, 114a—b.

<sup>11</sup> Sin—75, 145 a—b.

გალობელში გამოხატულია მწარე ხვედრი „მიწისაგან წარმოშობილი“ კაცისა. ყოველივე საქმეს, ნაღვაწს, ნაშრომს სიკვდილი გააქრობს.

„რომელი შუება სოფლისა დაადგრების თნიერ მწუხარებისა,  
რომელი დიდება ჰგიეს ქუეყანასა ზედა შეუცვალებელად?  
ყოველივე აჩრდილისა უძღლურეს არს.  
ყოველივე სიზმრისა უმაცურეს არს;  
ერთი წამი-და ამას ყოველსა სიკუდილი უჩინო-ჰყოფს“<sup>12</sup>.

ადამიანის სული ხორცთაგან განსვლის, განშორების წინ მარტოა, მისი შემწყალე არაეინაა ძე-ხორციელთა და უხორცოთა შორის. ამოდ ევედრება ადამიანი ანგელოზებს, ღმერთს, „არავინ არს შემწე მისა“. ამიტომ წუთისოფლის წარმავლობა და დაუდგრომლობა უნდა შევიგნოთ. იოანე დამასკელი ჩვენს ცხოვრებას წუთს უწოდებს. ყველაფერი — ოქრო, ვერცხლი, მონათა სიმრავლე და სხვა — ამოა, ყველაფერი დროებით მიენიჭა ადამიანს და ყოველივე გაქრება, ვითარცა სიზმარი.

„ყოველივე ამო არს კაცობრივი,  
რაოდენიცა რაი ჰგიეს შემდგომად სიკუდილისა;  
არა დაადგრების სიმდიდრე,  
არცა თანაწარყვების დიდება;  
რამეთუ მოიწია სიკუდილი  
და ესე ყოველი მყის იავარყო“<sup>13</sup>.

ყოველგვარი სიმდიდრე მტვრად იქცევა, ეს ცხოვრებაც სიზმარია და აჩრდილი. რა არის ადამიანი? დამასკელი პასუხობს: „მე ვარ მიწა და ნაცარი“. ადამიანი მიწად იქცევა, სიკვდილს ვერსად გაექცევა, ვინც არ უნდა იყოს იგი და როგორც არ უნდა იყოს, მეფე იქნება თუ მხედარი, მდიდარი ან გლახაკი, მართალი ან ცოდვილი. საბოლოოდ ყველა ერთი გზისკენ მიდის, ეს გზაა სიკვდილისა, რაც ყველა ადამიანში მეტნაკლებად იწვევს გულისტკივილის საშინელ გრძნობებს.

სიკვდილის სურათით აღშფოთებული ავტორის მწარე გრძნობები გამოსავალს პოულობენ „სიტკბოსა შინა და ნათელსა კაცთ-მოყუარე ქრისტეს პირისასა“, რომელსაც ის სთხოვს მიცვალებუ-

<sup>12</sup> კ. კეკელიძე, „გოდების“ ენრი და „გლოვის წესი“ ძველს ქართულ ლიტერატურაში, ეტიუდები ძველი ქართული ლიტერატურის ისტორიიდან, I, თბილისი, 1956, გვ. 201.

<sup>13</sup> კ. კეკელიძე, დასახ. ნაშრ., ეტიუდები... I, გვ. 202.

ლის „განსვენებას“. კ. კეკელიძე აღნიშნავს, რომ ადამიანის გულში ქრისტეს წამებაც კი საშინელ გრძნობებს აღძრავს, თვით ჯვარცმული ქრისტეც გულის სიღრმიდან ამოხეთქილი კვნესით ეკითხება ებრაელებს, რისთვის სჯიან მას, ნუთუ იმ ქველმოქმედებისათვის, რასაც თავისი ხანმოკლე სიცოცხლე მიუძღვნა. „რასა მომაგებთ მე ბოროტსა კეთილისა წილ?“ ღმერთ-კაცს გული წყდება, რომ „სჯულის მომცემელს“, „მწყალობელ მეუფეს“, „ქველ-მოქმედს“, „მაცხოვარს“ სჯიან და ჯვარს აცვამენ, „ნაცვლად კურნებათა მომწყლავთ მე, ნაცვლად ცხოვრებისა მომკლავთ მე“, ვითარცა უსჯულოსა და დასასჯელსა<sup>14</sup>. ქრისტეს საგალობელშიც იგრძნობა ამქვეყნიურ ცხოვრებასთან განშორების სიმძიმე, სულისა და ხორცის გაყრის შიში მასაც აქვს. მას სინანულის გრძნობა იპყრობს სიკვდილით დასჯის წინ, თუმცა იცის, რომ სამი დღის შემდეგ აღსდგება.

მიქაელ მოდრეკილის ჰიმნოგრაფიულ კრებულში მოთავსებულ აღდგომის საგალობელში მოისმის მსოფლიო სევდის მოტივი და სიკვდილის გარდუვალობის იდეა, აქ მოცემულია არსებობის ამოცანების შეცნობით გამოწვეული განცდა, როგორც პოეტური სევდის მარადიული წყარო: „წარმავალ არს ხატი ამის სოფლისაჲ, ვითარცა თქუა პირველ მოციქულმან, რაჟამს შუებაჲ საწუთროჲსაჲ ყოვლითურთ დაუდგრომ არს, და განქარდების დიდებაჲ, და მთავრობაჲ მიეცემის დავიწყებად, მძლავრთა საშინელთა მძუნვარებაჲ მოაკლდების და განიხრწნების საფლავსა შინა, ვინაჲთგან ჯერ არს ურჩებისათჳს მიქცევად მიწაჲ მიწადვე“<sup>15</sup>. როგორც ამ ნაწყვეტიდან ჩანს, საეკლესიო წოდების წარმომადგენელიც ერთგვარი გულისტკივილითა და სინანულით აღიარებს სოფლის წარმავლობასა და დაუდგრომლობას. ამავე აზრის დადასტურებას ვაწყდებით იოანე პეტრიწის „სათნობათა კიბის“ ერთ-ერთ ორიგინალურ იამბიკოში, რომელიც ასე იკითხება:

„არარაჲ არს სოფელსა შინა მტკიცე.  
ყოველივე მსწრაფლ წარმავალ არს სრულიად:  
არცა სიმდიდრე, არცა სიგლახაკე და  
არცა დიდება — აჩრდილი და სიზმარი.  
მოიძულე შენ ყოველი, მონაზონო!“<sup>16</sup>

<sup>14</sup> იქვე, გვ. 203—204.

<sup>15</sup> S — 425, გვ. 405 (R — 203), სტრ. 15—18.

<sup>16</sup> ი. პეტრიწი, სათნობათა კიბე, გამოსაცემად მოამზადა და გამოკვლევა დაურთო ი. ლოლაშვილმა, თბილისი, 1968, გვ. 173.

ყოველივე ამქვეყნიური — სიმდიდრეც, დიდებაც, სიგლახაკეც — აჩრდილი და სიზმარია, ამიტომ ღვთისმსახურს იოანე პეტრიწი ურჩევს, რომ ესენი შეიძლოს. ეს იმას არ ნიშნავს, თითქოს ამქვეყნიური ცხოვრება ყოველმხრივ არარაობას წარმოადგენდეს. სწვდიანი განწყობა ღვთისმეტყველთ იმიტომ ეუფლებათ, რომ გრძნობენ სოფლის წარმავლობას. პეტრიწიც სწორედ სოფლის უმტკიცობას უსვამს ხაზს. იგი აღიარებს ყოველივეს „მსწრაფლ წარმავლობას“, ადამიანის არსებობის ამაოებას. ეზრა ათონელი იოანე ათონელისადმი მიძღვნილ საგალობელში აღნიშნავს: „დიდებაჲ მსოფლიოჲ განხრწნადი დაუტევე, იწროსა მას გზასა მავალ-ჰყვენ ფერკნი შენნი, მამაო იოანე, ხოლო უცხოებაჲ გექმნა შენდა წინამძღურად გზისა მის ქეშმარიტისა, და სავანედ შეუენიერად მიიწიე მადლისა სიმდაბლისა და საშუებელად ჰჰოე მორჩილებაჲ უზაკუველი, წმიდაო, რომელთა მიერ აწ აღიწიე, ღირსო, სრულსა სისრულესა ზეცისა სუფევისასა, მომიცენენ ჩუენ მადიდებელნი შენნი!“<sup>17</sup> ბუნებაში ყველაფერი იცვლება განუწყვეტლივ, ერთის სიკვდილი და მეორის დაბადება ხდება მუდმივი განახლების საფუძველი. მიქაელ მოდრეკილის ჰიმნოგრაფიულ კრებულში მუდმივი ცვალებადობისა და განახლების შესახებ წერია: „განსაკრველი ხილვაჲ იხილვა დღეს იორდანეს, დამბადებელი ეტყოდა დაბადებულსა თვისსა, ვითარმედ ჯერ არს ჩემდა აწ ნათლისღებაჲ კორცითა რაჲთა სოფლისა მნებავეს განწყვედაჲ და მორწმუნეთა შემოსად უხრწნელებაჲ, რაჲთა კუალად განვაახლო, რომელი ხატად ჩემდა დავჰბადე პირველ და გალობით მადიდებენ“<sup>18</sup>. წმიდა გიორგისადმი მიძღვნილ თეოფანეს საგალობელში, რომელიც გიორგი ათონელს უთარგმნია და შეუტანია „თთუენში“ „ღმრთიშობლისანის“ კილოზე, იესო ქრისტეს ამქვეყნად მოვლინებით განახლდა ზოგადი ადამიანური ბუნება: „არსებითი ცხოვრებაჲ გვშევე, ქალწულო, რომელმან-იგი წყალობითა თვისითა სახიერებით აცხოვნა ხატი თქსი, ურჩებითა განხრწნილი, და განაახლა კაცობრივი ბუნებაჲ დაძუელელებული“. ბუნებაში ყველაფრის ცვლა და განახლება მიმდინარეობს. ადამიანებმა გაჩენის დღიდან უამრავი ცოდვა ჩაიდინეს, ამიტომ მათ მოსანანიებლად მოავლინა ღმერთმა ქრისტე, მისმა კაცებრივმა (ადამიანურმა) ბუნებამ უნდა განაახლოს ადამის მოდგმის ბუნება, რადგან „მსგავსებისაგან დაკლებულმა“ ბოროტი გაამრავლა.

17 ჩვენი საუნჯე, I, თბილისი, 1960, გვ. 501.

18 S — 425, გვ. 190 (V — 95), სტრ. 35—38.

სასულიერო პოეზიაში შემუშავებული აზრი სოფლის წარმავლობასა, არამდგრადობასა და უმტკიცობაზე რუსთაველის „ვეფხისტყაოსანშიც“ არის ერთგვარად გაზიარებული შემდეგი აფორიზმით:

„რა ვარდმან მისი ყვაილი გაახშოს, დაამჭნაროსა,  
იგი წავა და სხვა მოვა ტურფასა საბალნაროსა“

(35, 2—3)<sup>19</sup>.

რუსთაველის ამ სიტყვებიდან ნათლად ჩანს, რომ იგი შერიგებულია ამოების, ცხოვრების წარმავლობა-ცვალებადობის იმ კანონზომიერებას, რაშიც ის არსებობის ჰარმონიას ხედავს. ამიტომაც არის, რომ რუსთაველი ცხოვრებას უამედოს არ ხდის. მის გმირებში სევდა და მისი გამომწვევი მიზეზები ვერ სძლევენ ამქვეყნიურ ყოფნაში მშვენიერებისა და სიკეთის შეგრძნებას. ყოველივე იბადება, იზრდება, კვდება. ცალკეულ მოვლენათა გარდამავლობა ბუნების არსებობის აუცილებელი და ურყევი საფუძველია. რუსთაველის აზრით, როგორც ვხედავთ, აღმოცენების პირობაა და სინამდვილის განახლებისა და მარადიულობის ძალას წარმოადგენს სიცოცხლისა და სიკვდილის ურთიერთცვალება.

რუსთაველის გმირებს შეგნებული აქვთ სიკვდილის გარდუვალობა. ძველი ქართული სასულიერო პოეზია აქაც შეიძლება პოეტის პირველწყაროდ ჩაითვალოს. იოანე პეტრიწის „სათნობათა კიბე“ გვაუწყებს:

„სხუათა ვნებათა თჳსი წინა-განმწყობი  
ყოველთავე აქუს და იკურნებიანცა,  
ხოლო სიკუდილი ყოვლით კერძ მოისწრაფის,  
მოწყინება არს და დაქსნა ახოვნისა  
ზენას სულისას სიმკნესა გამოცდილსა“<sup>20</sup>.

სიკვდილის მსახვრალი ხელი ყველას მისწვდება, იგი ყველასთვის გარდუვალია. ავთანდილი უცხო მოყმის საძებრად წასვლის წინ შერმადინს უბარებს, რომ როსტევეან მეფეს არ გააგებინოს მისი წასვლა, მაგრამ თუ დაიღუპა და დათქმულ დროზე ვერ მოვიდა, მაშინ როსტევეანს

„აცნობე ჩემი სიკვდილი. — იყავ მართ ვითა მთრვალია,  
მიხვდა-თქო საქმე, რომელი ყოველთათვის გარდუვალია“

(156, 2—3).

<sup>19</sup> „ვეფხისტყაოსნის“ ტექსტი დამოწმებულია 1966 წლის საიუბილეო გამოცემის მიხედვით.

<sup>20</sup> ი. პეტრიწი, სათნობათა კიბე, გვ. 199.

სიკვდილი ყოველდღე, ყოველ წამს მოსალოდნელია. ის, ვინც მას ელის ყოველთვის, გამოცდილად იწოდება პეტრიწთან, რადგან ეს ბუნების მოქმედებად ითვლება:

„მოელოდის ვინ სიკუდილსა სამარადოდ,  
იგი სრულიად გამოცდილი არს ყოვლითურთ,  
ნება გულისა დაუტყვებიეს მას  
და ყოველთაგან მსოფლიოთა ზესთა არს  
გარეგან ქმნითა ბუნებისაჲთა ყოვლად“<sup>21</sup>.

სიკვდილი ქურდია. „მპარავია“, „სულ-მოკლე და არამადროებელია“, იგი „წარიყვანს“ სულს სხეულისაგან და მიჰყავს იქ, სადაც ღმერთია („სადა ერთი დამსკუთალულ არს“). ქართულმა სასულიერო პოეზიამ ისეთი მოტივები, თემები და იდეები წამოაყენა წინა პლანზე, რომელნიც შემდგომში საერო პოეზიამაც გაიმეორა, ოღონდ თავისებურად გადამუშავებული და ათვისებული. რუსთაველი სიკვდილის გარდუვალობაზე მთელ მონოლოგს ქმნის ავთანდილის ანდერძში როსტევან მეფისადმი:

„სცთების და სცთების, სიკვდილსა ვინ არ მოელის წამისად;  
მოვა შემყრელი ყოველთა ერთგან დღისა და ღამისად.  
თუ ვერა გნახე ცოცხალმან, სიცოცხლე გქონდეს ჟამისად“  
(792, 2—4).

აშკარად მოისმის ამ სიტყვებში სინანული და გულისტკივილი სოფელთან მოსალოდნელი განშორების გამო. რუსთაველის გმირებისათვის ამქვეყნიურ ცხოვრებასთან გაყრა მაინც აღსავსეა უდიდესი ტრაგიზმით.

ამქვეყნიურ ცხოვრებასთან გაყრით გამოწვეული სევდა და სინანული გამოხატულია ძველ სასულიერო პოეზიაში. ყოველივე ამსოფლიური არის წარმავალი, ამო და ყოველივე მიდის იმქვეყნად, ღმერთმა მიწისაგან შექმნა ადამიანი და მიწადვე უნდა იქცეს იგი. „ეკლესიასტეში“ ნათქვამია: „რადთა ყოველივე ამო და ყოველივე ერთსა ადგილსა მივალს: ყოველივე შეიქმნა მიწისაგან და ყოველივე მიიქცევის მიწადვე და ვინ იცის სული ძეთა კაცთაჲ უკუეთუ აღვალს იგი ზმ და სული პირუტყუთაჲ უკუეთუ შთავალს იგი ქუეყანად“<sup>22</sup>. ყოველგვარი გრძნობა, ყოველივე საქმიანობა ამოდ ითვლება სასულიერო პოეზიაში, ამის გამოა სინანულის გრძნობაც გამოთქმული. ამიტომ ცოცხალი ადა-

21 ი. პეტრიწი, სათნოებათა კიბე, გვ. 185.

22 ეკლესიასტე, გვ. 196.

მიანი უნდა ეცადოს მხოლოდ სიკეთის ჩადენას, მხოლოდ ქველმოქმედებას, რადგან ზოგიერთი გარდაცვლილი თავისი საქმიანობის მიხედვით ცოცხალზე მეტად ფასდება. ამ აზრის გამოხატულებას წარმოადგენს „ეკლესიასტეში“ ნათქვამი სიტყვები: „და ვაქენ მკუდარნი, რომელნი მომწყდარ არიან, უფრომს ცხოველთასა, რომელნი ცოცხალ არიან აქამომდე. და უმჯობეს არს ამათ ორთავე, რომელი არღარა იყოს, რომელმან არა იხილა ყოვლითურთ ქმნული ესე ბოროტი, რომელნი იქმნებიან ცასა ქუეშე. და ვიხილე მე ყოველი შრომაჲ და ყოველი მკნჭ ქმნულთაჲ. რა შური კაცისაჲ მოყუსისაგან თქსისა ამაო და კდომა სულისა“<sup>23</sup>. ბიბლიური გადმოცემა ადამიანის შექმნის შესახებ მიწისაგან და მისი მიწადვე გადაქცევის შესახებ იოანე პეტრიწმა თავისებურად გადაამუშავა და „სათნობათა კიბეში“ თქვა:

„რვათა მათგანი ერთი ესე არს ვნება  
უმძიმესი და ძნელი და მოსაწყინო.  
არაჲთ იძლევის უფრომს ვიდრე სიკუდილის  
კსენებითა და საფლავისა ჭურჭითა,  
ვინამთგან მიწა მიწადვე მიმავალ არს“<sup>24</sup>.

ყოვლის მომსრველი სიკვდილი ცელს ყველას უსვამს, ყველა მოკვდავია. სიცოცხლესთან განშორების უდიდესი სინანული იგრძნობა არსენ იყალთოელის მიერ დაწერილ დავით აღმაშენებლის ეპიტაფიაში:

„ვის ნაჭარმაგვეს მეფენი შვიდნივე პურად დამესხნეს,  
თურქნი, სპარსნი და არაბნი საზღუართა იქით გამესხნეს,  
თევზნი ამერთა წყალთაგან იმერთა წყალთა შთამესხნეს,  
აწე ამათსა მოქმედსა კელნი გულზედან დამესხნეს“<sup>25</sup>.

ადამიანის, მოცემულ კონკრეტულ შემთხვევაში — მეფის დავით აღმაშენებლის უდიდესი საქმიანობა, მისი ზრუნვა დარუბანდიდან ნიკოფსიამდე გადაჭიმული საქართველოს საზღვრებზე, ხალხის ბედნიერებასა და თავისუფლებაზე სიკვდილის წინაშე უძლური აღმოჩნდა. სასულიერო პოეზიაში გამოთქმული შეხედულება სიკვდილის გარდუვალობის შესახებ რუსთაველმა თავისებური გადამუშავების შემდეგ გადმოგვცა ავთანდილის ანდერძში:

<sup>23</sup> ეკლესიასტე, გვ. 189.

<sup>24</sup> ი. პეტრიწი, სათნობათა კიბე, გვ. 200.

<sup>25</sup> ჩვენი საუნჯე, 1, თბილისი, 1960, გვ. 523.

„ვერ დაიჭირავს სიკვდილსა გზა ვიწრო, ვერცა კლდოვანი;  
მისგან გასწორდეს ყოველი, სუსტი და ძალგულოვანი;  
ბოლოდ შეყარნეს მიწამან ერთგან მოყმე და მხცოვანი.  
სჯობს სიცოცხლესა ნაზრახსა სიკვდილი სახელოვანი!“

მებრძოლი და მეგობრისათვის თავდადებული ავთანდილი აღწევს თავის საწადელს ამქვეყნად და იმქვეყნადაც განიმზადებს საუკუნო სასუფეველს. რუსთაველის გმირები ყოველგვარი მძიმე მდგომარეობიდან გამონახავენ ხოლმე გამოსავალს. სიცოცხლე სახელოვანი უნდა იყოს, სიკვდილისაკენ სწრაფვა ვაეკაცობად არ მიიჩნევა. ავთანდილი არწმუნებს ტარიელს, რომ „სოფლიდან“ პასიური განშორება უაზრობაა.

რუსთაველის პოემა მთლიანად სიცოცხლის ღირებულებათა დამტკიცებისადმია მიძღვნილი და მიწიერი სინამდვილის ფასეულობის დამკვიდრებას ცდილობს. რუსთაველი ცხოვრებისეულ ტენდენციებში ღრმა ორიენტირების უნარს ამჟღავნებს და თუ მისი გმირები ზოგჯერ სიკვდილის პასიურ ნატვრას გამოთქვამენ, ეს მხოლოდ დროებითი და წარმავალია, ბედის უკუღმართობით გამოწვეული, რასაც კეთილის შემოქმედი და ბოროტის არდამბადი ღმერთი ადამიანის სასიკეთოდ შეცვლის ადამიანისავე მცდელობის მიხედვით. იგი ყოველთვის ცხოვრების სიყვარულის, სიხარულისა და რწმენის სტიქიაშია, რადგანაც რუსთაველი შერიგებულია ცხოვრების წარმავლობას, სიკვდილის გარდუვალობას, სწამს, რომ „ერთი წავა და სხვა მოვა“, რაშიაც ადამიანის არსებობის ჰარმონიას ხედავს. სწორედ ეს არის „ვეფხისტყაოსნის“ გმირთა სულიერი წონასწორობის, ოპტიმიზმის საწყისი და დასაბამი. რუსთაველის გმირების ოპტიმისტური განწყობილება აქარწყლებს ყოველგვარ შიშსა და ეჭვს ადამიანის სიცოცხლის წარმავლობაზე. ამიტომაც ვერ სძლევს მათში ამქვეყნიური ცხოვრების ცვალებადობით გამოწვეული სევდა ამქვეყნიური ცხოვრებით გამოწვეულ სიხარულს, ბედნიერებისა და სიკეთის შეგრძნებას.

ამგვარად, ძველ ქართულ სასულიერო პოეზიაში შემუშავებული აზრი სოფლის ცვალებადობა-წარმავლობის შესახებ, რომელიც თავისთავად სათავეს, დასაბამს ბიბლიიდან იღებს, რუსთაველმა თავისებურად გადაამუშავა, რასაც გამოუნახა ჰუმანისტური საფუძველი და ცხოვრების აზრი ადამიანობაში, მცდელობაში, ბოროტის წინააღმდეგ კეთილისათვის ბრძოლაში დაინახა. რუსთაველის გმირები იბრძვიან არა მხოლოდ სულის ცხოვრებისათვის, როგორც ამას სასულიერო პოეზიის და, საერთოდ, სასულიერო მწერ-

ლობის, ნიმუშებში ვხედავთ, არამედ ამქვეყნიური ბედნიერებისათვის ბრძოლისაკენ არის მიმართული მათი მოქმედება, ისინი ყველგან თავიანთ ბედნიერ მომავალს სწირავენ. სწორედ ამას გულისხმობს ტარიელის სიტყვები: „სულთა ვყიდდი გულისათვის, კოშკი ამაღ გამებაზრა“ (529,1). უპირველეს საკითხად ტარიელი აყენებს ლტოლვას ამქვეყნიური ბედნიერებისაკენ („გულისათვის“), რაც თავისთავად მოწმობს რუსთაველის მისწრაფებას ღრმა ჰუმანური იდეებისაკენ. „ვეფხისტყაოსანში“ სოფლის წარმავლობითა და სიკვდილის გარდუვალობით გამოწვეულ სევდას სძლევს ადამიანური ბედნიერებისათვის ბრძოლა და ღრმა ოპტიმიზმი, რითაც რუსთაველი ემიჯნება სასულიერო პოეზიას და გვევლინება ჰუმანისტური იდეების მქადაგებლად.

## II. „ცოდვა“ და „შენდობა“

ძველ ქართულ სასულიერო პოეზიაში ერთ-ერთ მნიშვნელოვან პრობლემას წარმოადგენს ცოდვისა და შენდობის საკითხი. როგორც ცნობილია, ქრისტიანული რელიგიის თვალსაზრისით, ცოდვა ორგვარია: 1. მემკვიდრეობითი ცოდვა — პირველცოდვა, რომელიც ადამ და ევასაგან იღებს დასაბამს, რომელიც ყოველ ადამიანს დაბადებისთანავე თან დაჰყვება, ყოველი ადამიანი დაბადებიდანვე ცოდვილია, რადგან ადამისა და ევას, რომლებიც არიან ადამიანთა მოდგმის არქეტიპები, პროტოტიპები, ადამიანურის პირველი მაგალითები, შეცოდება აბსოლუტურად ყველა ადამიანზე გადადის; 2. პირადი ცოდვა, რომელიც ადამიანის თავისუფალი ნებითაა გამოწვეული და ამის მიხედვით ან დასასჯელი, ან შესანდობელი, რაც დამოკიდებულია ცოდვის სიღრმესა და სიღადეზე. ღმრთისმეტყველების მიხედვით, ცოდვა თვისობრივადაც ორგვარია: სულიერი ხასიათისა და გრძობითი ხასიათისა. სულხან-საბა ორბელიანი ცოდვათა შემდეგ სახეობებს განასხვავებს: „ა) ცოდვა ბუნების გარეგანი — სოდომური და პირუტყვთანა; ბ) ცოდვა მომაკვდინებელი — ყოველივე დიდი ცოდვა; გ) ცოდვა შემთხვევით ანაზღეულ ქმნილი და არა ჩვეულებითი; დ) ცოდვა შესანდობელი — მცირე და არა მომაკვდინებელი; ე) ცოდვა ჩვეულებითი — შეჩვეული და მრავალგზის ნაქმარი; აგრეთვე ცოდვილი ეწოდება ცოდვის მოქმედს, ქრისტიანესა შემცოდესა“<sup>26</sup>. უშუალო და ცოდვილი განსხვავებულია ს.-ს ორბე-

<sup>26</sup> ს.-ს. ორბელიანი, ქართული ლექსიკონი, II, თბილისი, 1966, გვ. 339.

ლიანის ლექსიკონში. უმჯულო ეწოდება „წარმართთა და ქრისტეს ურწმუნოთა, რომელთა არა იციან ცოდვა, თუ რაჲ არს“<sup>27</sup>. როგორც საბა აღნიშნავს, ცოდვილი ანუ ცოდვის მოქმედი ეწოდება „ქრისტიანესა შემცოდესა“, ხოლო „წარმართთა და ქრისტეს ურწმუნოთა“ არ იციან, თუ რა არის ცოდვა. ამის საფუძველზე „ვეფხისტყაოსნის“ ცნებანი „ცოდვა“ და „შეცოდება“ ქრისტიანულნი არიან.

ქრისტიანულ მსოფლმხედველობაში ცოდვათა შორის ხარისხობრივ განსხვავებას განსაკუთრებული მნიშვნელობა არ ენიჭებოდა. ყოველი ადამიანური ცოდვა, მისი სიმძიმის მიუხედავად, უნდა მიტევებოდა ადამიანს, თუკი მას მოინანიებდა. იოანე პეტრიწის აზრით, ამისათვის საუკეთესო საშუალება იყო „სოფლით გამოსლვა“, ე. ი. ღვთისმსახურად კურთხევა. ცოდვათა მონანიების, მის ნაცვლად სასუფეველის მიღების მიზნით ტოვებს ადამიანი „სოფლის საქმეთ“.

„სამთაგანი არს სოფლით გამოსლვა, ბრძენო:  
ანუ ცოდვათა მოსაგებელის კრძალვით,  
ანუ სურვილით სასუფეველის ღირსად,  
ანუ უფროჲს საზომისა მოღებით,  
რომელ არს ღმრთისა სიყუარული მალალი“<sup>28</sup>.

ცოდვა, სასულიერო პოეზიისა და „ვეფხისტყაოსნის“ მიხედვით, განიკითხება საიქიოში, „მას საუკუნოსა“ ისჯება ცოდვილი. ცოდვა, რომელიც ადამიანის პირადი საქმიანობიდან და მოქმედებიდან გამომდინარეობს, შეიძლება ადვილად ან ძნელად მოინანიოს ადამიანმა, ყოველ შემთხვევაში პირადი ცოდვის მონანიება შეიძლება და ადამიანის წინაშე არ დგას პრობლემა მისი შეუძლებლობის შესახებ. რაც შეეხება პირველცოდვას, რომელიც მემკვიდრეობით გადმოეცა ადამიანთა მოდგმას, მხოლოდ შემსუბუქება შეიძლება მისი და არა მთლიანად მონანიება. ქრისტიანული მსოფლმხედველობის მიხედვით, არ არსებობს პირველცოდვისაგან თავისუფალი ადამიანი და არც შეიძლება მისგან განთავისუფლება. ადამთან, როგორც პირველ ადამიანთან, მთელი კაცობრიობაა დაკავშირებული, რომელიც წარმოადგენს განუყოფელ და ერთიან ორგანიზმს და ყოველ ცალკეულ ადამიანს აქვს წინა ცხოვრება თავის წინაპრებში და მომავალი — თავის შთამომავლებში. ამდენად

<sup>27</sup> ს.-ს. ო რ ბ ე ლ ი ა ნ ი, ქართული ლექსიკონი, II, თბილისი, 1966, გვ. 339.

<sup>28</sup> ი. პ ე ტ რ ი წ ი, სათნოებათა კიბე, გვ. 170.

ნათელია, რომ ყველა ადამიანი უკვე არსებობდა ადამში თავისი ზოგადადამიანური ფორმით. ადამიანი თავისი ბუნებით მონაწილეობდა ადამის შეცოდებაში. პირველ ადამიანში ცოდვის გზით დასაბამი მიიღო სიკვდილმა და ამ საწყისით დამკვიდრდა იგი და გადავიდა ადამის შთამომავლებში, ადამიანებში. ამიტომაც არ არსებობს პირველცოდვისაგან თავისუფალი ადამიანი. ხოლო ვინაიდან შემოქმედმა ღმერთმა არ მიუტევა ეს შეცოდება ადამს, ადამიანთა არქეტისს, პროტოტიპს, პირველსახეს, „სახეს ყოვლისა ტანისას“, ცხადია, მისი ცოდვა გადაეცა მის შთამომავლებსაც, ადამიანებსაც, და ღმერთმა არც ადამის შთამომავლებს არ მიუტევა ეს ცოდვა, პირველცოდვა, რომლის ნაყოფსაც წარმოადგენენ ისინი. შემოქმედ ღმერთს შეუძლია ადამიანთა მოდგმას მხოლოდ შეუმსუბუქოს ცოდვა, რომელიც საიქიოს თან უნდა გაჰყვეს, რუსთაველის სიტყვით, „მუნ თანა წასატანი“ ცოდვა. ამიტომაც მოევლინა ქვეყანას კაცად ქრისტე, ძე-ღმერთი, რათა შეუმსუბუქოს ადამიანთა მოდგმას პირველცოდვის სიმძიმე თავისი განხორციელებით. ეს იცოდა საქართველოს დიდებულმა მეფემ დავით აღმაშენებელმა, როდესაც ღმერთს ცოდვათა მიტევებას ევედრებოდა; მას ცოდვად მიაჩნდა არა მხოლოდ საქმით ჩადენილი სიბოროტე, არამედ გონებაში გავლებული რაიმე უკეთური აზრიც კი. მეფე-პოეტს სწამდა, რომ ყოვლისშემძლე ღმერთი იხსნის მას ამქვეყნიური ცოდვებისაგან. „დავით აღმაშენებლის „გალობანი სინანულისანში“ საუბარია არა მხოლოდ ერთ რომელიმე კონკრეტულ ცოდვაზე, არამედ ცოდვათა რიგზე, რომელიც ჩადენილია ადამიანთა მოდგმის დასაბამიდან“<sup>29</sup>. დავითმა თავი ცოდვილთა შორის უცოდვილესად წარმოგვიდგინა. მისი თვითბრალდება — „მსგავსებისაგან დავაკლდი და დავჰბადე ბოროტი“ — შეიცავს პირველცოდვის ქრისტიანულ გაგებას. „მსგავსებას დააკლდა“ ადამი მაშინ, როდესაც გველისაგან შეცდენილმა ევამ ადამიც შეაცდინა, იგემა ნაყოფი ცხოვრების ხისა და „დაჰბადა ბოროტი“, ჩაადენინა ცოდვა. ადამიანს თავისი ცხოვრების მანძილზე ეძლევა როგორც შეცდომათა დაშვების, ასევე მისი გამოსწორების შესაძლებლობა. მაგრამ პირველცოდვის მონანიება და ამ შეცდომის გამოსწორება შეუძლებელია, რადგან პირველცოდვა უკვე ჩადე-

<sup>29</sup> ლ. გ რ ი გ ო ლ ა შ ვ ი ლ ი, დავით აღმაშენებლის „გალობანი სინანულისანის“ კონცეფციისათვის, ქართული ლიტერატურის საკითხები, ახალგაზრდა მეც. მუშაკთა და ასპირანტთა ნაშრომების კრებული, II, თბილისი, „მეცნიერება“, 1971, გვ. 49.

ნილია და იგი მრავლდება ადამიანთა მოდგმასთან ერთად, შესაძლებელი მხოლოდ შემსუბუქებაა მისი.

„ფსალმუნში“ ვკითხულობთ: „ნეტარ არიან, რომელთა მიუტევნენ უშჯულოებანი და რომელთა დაეფარნენ ცოდვანი. ნეტარ არს კაცი, რომელსა არა შეურაცხა უფალმან ცოდვად, და არცა არს სულსა მისსა ზაკვად“ (31, 1—2)<sup>30</sup>. „ცოდვად თუ ვიბილო გულსა ჩემსა, ნუ ისმენ უფალი“ (65, 18)<sup>31</sup>. „ცოდვად მოვიძულე და მოვიძაგე, ხოლო შჯული შენი შევიყუარე“ (118)<sup>32</sup>. „ქეშმარიტად და სიმართლით მოავლინე ესე ყოველი ჩუენ ზედა ცოდვათა ჩუენტათჳს. რამეთუ შეგცოდეთ ჩუენ და უსჯულო ვიქმნენით განდგომად შენგან, და ვცოდეთ ყოველითურთ და მცნებათა შენთად არა ვისმინეთ, არცა დავიმარხეთ“ (გალობა 7)<sup>33</sup>.

მოყვანილ ნაწყვეტებში საუბარია ადამიანურ ცოდვაზე, აქ პირველცოდვა არ იგულისხმება. იოანე ათონელის საგალობელშიც ადამიანურ ცოდვათა მიტევებას ევედრება ქრისტეს ავტორი: „მოტევება ცოდვათა ჩუენტა ურიცხუთად ქრისტეს მიერ გკთხოვე, მამაო იოანე, რომელნი ვაქებთ დღესასწაულსა შენსა“<sup>34</sup>. „ვინაჲთგან ქრისტე გაქუს მაქებელად შენდა, ღმერთშემოსილო, და აღსარებულ ხარ წინაშე მამისა ზეცათაჲსა, უძლურ არს შენ წინაშე შემსხმელთა მეტყუელებად, არამედ შეიწირე წადიერებაჲ ჩემი და მითხოვე მისგან მოტევებად ცოდვათად“<sup>35</sup>.

„ეკლესიასტეში“ ნათქვამია: „კაცი არა არს მართალ ქუეყანასა ზედა, რომელმანცა კეთილი ქმნა და არა ცოდა“ (7,21)<sup>36</sup>.

ადამიანურ ცოდვათა განმათავისუფლებლად, მიმტევებლად „ძლისპირნი“ მიჩნეულია ძე-ღმერთი, იესო ქრისტე: „ნათლითა შენითა საღმრთოჲთა, დიდებულო, სულნი რომელთა აღიმსთუეს შენდამი სიყუარულით, განანათლენ რაჲთა გიცნან შენ ღმერთი მხოლოდ, განმათავისუფლებელი ცოდვათა მათთაგან“<sup>37</sup>. მა-

30. ფსალმუნნი, მ. შანიძის რედ., თბილისი, 1960, გვ. 72—73.

31. იქვე, გვ. 165.

32. იქვე, გვ. 350—351.

33. იქვე, გვ. 434.

34. ათონის ივერიის მონასტრის 1074 წლის ხელნაწერი კრებული ალაპეხითურთ, საეკლესიო მუზეუმის გამოც., აღ. ცაგარელის რედ., ტფილისი, 1901, გვ. 198.

35. იქვე, გვ. 200.

36. ეკლესიასტე, გვ. 211.

37. ძლისპირნი, ე. მეტრეველის რედ., თბილისი, 1971, გვ. 22.

რამ ღვთისმშობელი ქრისტეს შობის შემდეგ მარადიული ქალწულობით ევას მიერ ჩადენილ ცოდვას ამსუბუქებს: „შენ, რომელმან მოსპე ყუედრება დედისაჲ მის ევაჲსი, ქალწულო, და აჰკოცე კელით-წერილი იგი ცოდვისაჲ მუცლად-ღებითა კრავისა მის ღმრთისაჲთა, რომელი დაიკლა ჩუენთვის ჯუარსა ზედა“<sup>38</sup>. „შეცვალნა წესნი ბუნებათანი შობამან შენმან, ქალწულო უბიწოო, რამეთუ ღმერთი ბუნებათაჲ შენგან გუეუწყა, და ბუნებაჲ ჩუენი მან განმიახლა დაძუელებული ცოდვითა, ამისთვის მარადის გადიდებთ შენ“<sup>39</sup>. ცოდვის სიღრმიდან და უფსკრულიდან ამოყვანას ევედრებიან ქრისტე ღმერთს ჰიმნოგრაფები. ქრისტე, თავად უცოდველი და მაცხოვარი, ამ სოფლის ცოდვათა მიმტევებელია: „ესე არს კრავი ღმრთისაჲ უცოდველი, აღმზემელი ცოდვათა სოფლისათა, რომელმან განწმინდა წყალნი და განანათლნა კაცნი“<sup>40</sup>.

ცოდვათა შემსუბუქებას ევედრება შემოქმედ ღმერთს რუსთაველი. „ვეფხისტყაოსანში“ ხშირად არის საუბარი ცოდვასა და სინანულზე, ცოდვის ჩადენასა და მის შენდობაზე. სახარების ცნობილი გამოთქმა — „დალათუ შეიდგზის დღესა შინა შეგცოდოს შენ ძმამან შენმან... მიუტევე მას“ (მათე, XVIII, 22; ლუკა, XVII, 4) — მეორდება პოემაში: „შეცოდება შეიდ-გზის თქმულა შესანდობლად“ (243,4).

ცხადია, რუსთაველი ძალიან კარგად იცნობდა პირველცოდვის არსსა და მნიშვნელობას, მაგრამ, როგორც ქრისტიანული მოძღვრების სხვა დოგმები, მაგალითად, მაცხოვრობის შესახებ, ასევე ადამიანის თანდაყოლილი ცოდვისა და ამქვეყნიური არარაობის განცდა რუსთაველის გმირებისათვის დაძლეული პრობლემაა. იგი სხვაგვარად უყურებს იმ პრობლემებს, რომელიც ქრისტიანობამ წამოაყენა<sup>41</sup>. „ვეფხისტყაოსანში“ არსად არ ჩანს მინიშნება ადამიანის თანდაყოლილ ცოდვაზე. რუსთაველი მხოლოდ ადამიანის მიერ მის სიცოცხლეში ჩადენილ ცოდვებზე მსჯელობს, ადამიანურ ცოდვებს ეხება მხოლოდ და მის სამ სახეობას გამოჰყოფს.

<sup>38</sup> იქვე, გვ. 47.

<sup>39</sup> იქვე, გვ. 57.

<sup>40</sup> S—425, გვ. 146 (V—73), სტრ. 17—18.

<sup>41</sup> იხ. მ. გ. ო გ ი ბ ე რ ი ძ ე, რუსთაველი, პეტრიწი, პრელუდიები: თბილისი, 1960; გ. იმედაშვილი, ვეფხისტყაოსანი და ქართული კულტურა, თბილისი, 1968; ს. ცაიშვილი, შოთა რუსთაველი — დავით გურამიშვილი, თბილისი, 1974.

რუსთაველის აზრით, ყველაზე დიდ ცოდვად ითვლება ღვთა-  
ებისადმი, უზენაესი არსებისადმი, შეცოდება:

„იტყვის: ღმერთო, რა შეგცოდე შენ, უფალსა, არსთა მხედსა,  
რად გამყარე მოყვარეთა, რად შემასწარ ამა ბედსა?“ (851,1—2).  
„...ღმერთო, რა შეგცოდე, ეგზომ დიდი რა გაწყინე?  
რად შემასწარ ამა ბედსა, რა სასჯელი მომივლინე!“ (855,1—2).

ე. ი. ავთანდილის სიტყვებიდან ჩანს, რომ რაღაც ძალიან დიდი  
ცოდვა ადევს მას, რადგან ღმერთმა ასე დასაჯა, ასეთი მწარე ბე-  
დი არგუნა და საყვარელ არსებასა და მეგობარს ჩამოაშორა. ამის  
გამო მიმართავს ღმერთს, უფალს, არსთა მხედს ავთანდილი, მან  
არ იცის, რა ცოდვა ჩაუდენია და რისთვის სჯის მას ასე სასტი-  
კად და მკაცრად უფალი ღმერთი. მართალია, მან არ იცის, თუ  
რა ცოდვა აქვს ჩადენილი, მაგრამ შეგნებული აქვს საკუთარი შე-  
ცოდება, რისთვისაც ისჯება ღმერთისაგან. ავთანდილის სიტყვები  
მოწმობენ საკუთარი ცოდვის შეგნებას.

ცოდვის მეორე სახეობა, რუსთაველის შეხედულებით, არის  
ხელმწიფისადმი, ღვთის სწორი არსებისადმი, შეცოდება. ავთანდი-  
ლი ასმათთან საუბრისას ამბობს:

„პატრონი ჩემი გამზრდელი, ღმრთისაგან დიდად ცხოველი,  
მშობლური, ტკბილი, მოწყალე, ცა წყალობისა მთოველი,  
მას ეუორგულე, წამოვე, მართ დაეივიწყე ყოველი,  
მისი შემცოდე ღმრთისაგან კარგსა აღარას მოველი“ (847).

ცოდვის მესამე სახეობაა ადამიანის შეცოდება ჩვეულებრივი  
მოკვდავი ადამიანისადმი, იქნება იგი დიდებული თუ მონა.

ხვარაზმშას შვილის ნესტანის საქმროდ მოწვევის შედეგად  
განრისხებულ ინდოელ მზეთუნახავს ტარიელი ეუბნება:

„...პასუხს ვერას გკადრებ, თუ არა ვსცნობ მე მართალსა:  
რა შეგცოდე, რა მიქნია უცნობსა, ფერ-ნამკრთალსა?“ (517, 1—2).

მაგრამ იგივე ტარიელი, როდესაც ავთანდილს თავის თავგადასა-  
ვალს უამბობს, ამქლავნებს საკუთარი ცოდვის შეგნებას და ამბობს:

„სულთა ვყიდდი გულისათვის, კოშკი ამად გამებაზრა“ (528,1).  
მას შეგნებული აქვს, რომ ნესტანის დაკარგვით უმაგალითო ჭირში  
ჩავარდნა მის მიერ ჩადენილი ცოდვის პასუხია. ცოდვად ამ შემ-  
თხვევაში, შესაძლოა, ტარიელს ხვარაზმშას შვილის მოკვლა და  
ფარსადან მეფის წინაშე ამბოხის მოწყობა მიაჩნდეს.

ავთანდილის გაპარვით შეწუხებული არაბები ერთმანეთს ეკითხებიან (817,3):

„რა ვაწყინეთ. რა შევსცოდეთ. რად დაგვყარნა. რად გაგვწირნა!“

მათ არ იციან, რაში მდგომარეობს მათი შეცოდება ავთანდილისადმი, რისთვისაც ამ უკანასკნელმა დატოვა არაბეთი. არაბ დიდებულთ ავთანდილის გაპარვა თავიანთი ცოდვის პასუხად მიაჩნდათ.

უცხო მოყმის საძებრად მიმავალი ავთანდილი თავის ყმებს წერილს უტოვებს, რომელშიც ნათქვამია:

„მე შერმადინ დამიგდია, ჩემად კერძად პატრონობდეს, სიკვდილსა და სიცოცხლესა სადამდისცა ჩემსა სცნობდეს, ყოვლთა მზეებრ მოგეფინოს, ვარდს არ ზრვიდეს, არ აჭნობდეს, შემცოდესა ყველაკასა ვითა ცვილსა დაადნობდეს“ (166).

ადამიანური ცოდვა, მისი სიმძიმის მიუხედავად, შეიძლება მიეტეოს ცოდვილს, ადამიანისაგან გამომდინარე ცოდვას ღმერთი შეუნდობს. ეს არის ხაზგასმული ტარიელის სიტყვებში, რომელიც ინდოეთის მეფეს ფარსადანს ჰკადრა და რომლითაც ხატაელ რამაზს უშუამდგომლა:

„...ღმერთი ვინათგან შეუნდობს შეცოდებულსა, უყავით თქვენცა წყალობა მას ღონე-გაცუდებულსა“ (463, 1—2).

ავთანდილი წინააღმდეგობას უწევს ტარიელს იმის თაობაზე, რომ ტარიელი როსტევან მეფის წინაშე უშუამდგომლობას აპირებს თინათინისა და ავთანდილის საქმის მოსაგვარებლად და თავს იმით იმართლებს, რომ ეს ამბავი თინათინს გააბრაზებს, საყვარლის ნახვაც დაუძვირდება და „შენდობასა ხორციელი კაცი ვერა დამიურვებსო“ (1472,4), ე. ი. ხორციელთაგან ვერავინ ვერ მოუგვარებს სატრფოსაგან შენდობის საქმეს, თუკი მას აწყენინებს, შესცოდავს.

ავთანდილი თავის ანდერძში როსტევან მეფეს ევედრება შენდობას და მოწყალებას სთხოვს იმ ცოდვათა თუ დანაშაულთა ნაცვლად, რომელნიც მეფის წინაშე ჩაუდენია: „შემინდევ და წამატანე მოწყალება ღმრთაებრისად“ (779,4). მან შეცვალა მეფის მცნება, დაარღვია იგი, მეგობრობისათვის გადასდო თავი და ტარიელის საშველად გაეშურა. ეს მიაჩნია არაბ მოყმეს მეფისადმი შეცოდებად.

„რაზომცა სწყრები, შემინდევ შეცვლა თქვენისა მცნებისა.  
ძალი არ მქონდა ტყვე-ქმნილსა მე მაგისისა თნებისა;  
აწ წასლვა იყო წამალი ჩემთა სახშილთა გზნებისა.  
სადა გინდ ვიყო, რა მგამა, ყოფამცა მქონდა ნებისა“ (785).

შეიძლება დავასკვნათ, რომ ცოდვა, რომელსაც ჩაიდენს ადამიანი თავის სიცოცხლეში, მისი სიმძიმის მიხედვით, მიეტევება ან ადვილად, ან ძნელად; ყოველ შემთხვევაში, ადამიანური ცოდვის მონანიება და შენდობა შესაძლებელია, იგი ღმერთისა და ღვთის სწორი არსების, მეფის ხელშია, მათ შეუძლიათ შენდობა და შეწყალება ჩვეულებრივი მოკვდავი ადამიანების ცოდვებისა. მაგრამ სააქაოს შენდობილი ცოდვა საიქიოში მაინც განიკითხვის, რის შემდეგაც მოხვდება ადამიანის სული სამოთხეში ან ჯოჯოხეთში. ამიტომაც არის ყოველი ცოდვა „მუნ თანა წასატანი“, რომელსაც ღმერთი თუ მეფე ან ეკლესიის მსახური მხოლოდ უმსუბუქებს ადამიანს.

ამგვარად, „ვეფხისტყაოსნის“ გმირების მიერ ჩადენილი ცოდვა არის ადამიანური ცოდვა, მისი პირადი ცოდვა, რომელიც მისთვის მოქმედების შედეგს წარმოადგენს და რომლის თავიდან აცილებაც შესაძლებელი იყო და მონანიებაც შესაძლებელია. ძველი ქართული სასულიერო პოეზიისაგან განსხვავებით რუსთაველის პოემა დუმს მემკვიდრეობითი ცოდვის — პირველცოდვის, ადამიანის თანდაყოლილი ცოდვის შესახებ. რუსთაველისათვის პირველცოდვის განცდა დაძლეული პრობლემაა<sup>42</sup>, ხოლო სასულიერო პოეზიაში, ისევე როგორც მთელ სასულიერო მწერლობაში, პირველცოდვა არის ადამიანის თანდაყოლილი, მემკვიდრეობითი ცოდვა და იგი თავისი ზოგადი არსით მრავლდება ადამიანთა მოდგმის გამრავლებასთან ერთად, პირველცოდვისაგან თავისუფალი ადამიანი არ არსებობს. რუსთაველის გმირები თავისუფალნი არიან ქრისტიანული სარწმუნოების ამ ერთი ძირითადი დოგმისაგან და ყოველი მოქმედების საწყისად ადამიანური გრძნობა და განცდა მიაჩნიათ, რითაც რუსთაველი ემიჯნება ძველ სასულიერო პოეზიას და ახალი ჰუმანისტური იდეების მქადაგებლად გვევლინება.

<sup>42</sup> შტრ. ს. ცაიშვილი, შოთა რუსთაველი და დავით გურამიშვილი, თბილისი, 1974, გვ. 22.